



Memperkuat Pembangunan
Inklusif dan Kesejahteraan
Rakyat





Pendahuluan

Dalam tempoh akhir Rancangan, 2018-2020, pendekatan pembangunan inklusif akan terus dilaksana dengan penekanan kepada pertumbuhan dengan ekuiti. Pendekatan ini akan terus dipergiat untuk meningkatkan kesejahteraan semua rakyat Malaysia tanpa mengira jantina, kaum, status sosioekonomi dan lokasi geografi. Langkah bersepadu akan diambil terutama dalam membantu isi rumah miskin¹ dan berpendapatan rendah² serta kumpulan lain yang disasarkan dalam masyarakat. Pendekatan pembangunan inklusif adalah berteraskan kepada beberapa prinsip utama, iaitu ketelusan, berdasarkan keperluan dan merit, mesra pasaran, mampan dan menyokong pertumbuhan.

Berdasarkan semangat inklusiviti, rakyat akan mempunyai peluang yang saksama untuk menyertai dan mendapat manfaat daripada pertumbuhan ekonomi dan pembangunan negara tanpa mengira latar belakang. Peningkatan pendapatan akan menjadi strategi utama dalam mempertingkatkan tahap kemakmuran dan kesejahteraan rakyat serta menangani ketidaksamarataan sosioekonomi. Bagi mengurangkan ketidaksamarataan pendapatan yang masih wujud dalam masyarakat, langkah akan dipergiat untuk meningkatkan pendapatan dan kesejahteraan isi rumah berpendapatan pertengahan rendah³ daripada kumpulan isi rumah berpendapatan 40% terendah (B40).

¹ Isi rumah miskin merujuk kepada isi rumah yang berpendapatan kurang daripada Pendapatan Garis Kemiskinan (PGK). Berdasarkan Penyiasatan Pendapatan Isi Rumah dan Kemudahan Asas (PPIR & KA) 2016, PGK nasional ialah sebanyak RM980.

² Isi rumah berpendapatan rendah merujuk kepada isi rumah yang berpendapatan antara PGK dan separuh daripada pendapatan penengah bulanan isi rumah nasional (RM980 – RM2,614). Berdasarkan PPIR & KA 2016, pendapatan penengah bulanan isi rumah nasional ialah sebanyak RM5,228.

³ Isi rumah berpendapatan pertengahan rendah merujuk kepada isi rumah yang berpendapatan antara separuh daripada pendapatan penengah bulanan isi rumah nasional dan pendapatan penengah bulanan isi rumah nasional (RM2,614 – RM5,228).

Di samping itu, kumpulan yang terpinggir akan terus disokong untuk hidup berdikari dengan lebih bermaruah serta membolehkan peningkatan mobiliti sosial. Langkah ini juga akan menggabungkan keperluan untuk menganjak minda dan mengubah nilai rakyat daripada bergantung kepada bantuan Kerajaan supaya berdikari, inovatif dan rajin berusaha. Sementara itu, usaha untuk meningkatkan kesejahteraan rakyat termasuk meningkatkan kuasa beli, menyediakan perumahan mampu milik dan berkualiti, memperkukuh sistem penyampaian penjagaan kesihatan, menjadikan negara lebih selamat dan terjamin serta menggalakkan nilai murni dan gaya hidup aktif.





Keutamaan dan Penekanan Baharu, 2018-2020

Usaha untuk memperkukuh pembangunan inklusif dan kesejahteraan rakyat akan dipergiat dalam tempoh akhir Rancangan. Langkah pembangunan inklusif bertujuan mewujudkan masyarakat yang lebih saksama khususnya dengan meningkatkan pendapatan dan kuasa beli isi rumah B40 serta kumpulan sasar bagi mengurangkan ketidaksamarataan sosioekonomi.

Kesejahteraan rakyat pula akan dipertingkatkan untuk menambah baik kualiti kehidupan sejajar dengan pertumbuhan ekonomi. Bidang keutamaan dan strategi ke arah memperkukuh pembangunan inklusif dan kesejahteraan rakyat adalah seperti yang ditunjukkan dalam *Paparan 11-1*.

Paparan 11-1

Memperkukuh Pembangunan Inklusif dan Kesejahteraan Rakyat



Sasaran Terpilih, 2020

Menambah baik ketidakseimbangan pendapatan secara keseluruhan



Pekali Gini

Meningkatkan taraf isi rumah B40 ke arah masyarakat kelas menengah




Pendapatan purata bulanan isi rumah B40

Pendapatan penengah bulanan isi rumah B40

Insiden Kemiskinan Pelbagai Dimensi

Menangani keperluan kumpulan sasaran khusus



Skor purata Indeks Kesejahteraan Keluarga

Kadar penyertaan wanita dalam tenaga kerja

Skor purata Indeks Belia Malaysia

Memperkukuh Komuniti Ekonomi Bumiputera (BEC) untuk meningkatkan pemilikan kekayaan



Penyertaan Bumiputera dalam kategori pekerjaan mahir



Isi rumah Bumiputera memiliki seunit kediaman



Pertumbuhan tahunan pemilikan ekuiti korporat Bumiputera



Sasaran Asal



Sasaran Dipinda



Sasaran Baharu



Sasaran Terpilih, 2020

Peningkatan keseluruhan dalam Indeks Kesejahteraan Rakyat Malaysia (MyWI¹)

1.4%

Menyediakan perumahan mampu milik dan berkualiti

Memperkuh sistem penyampaian penjagaan kesihatan

200,000

2018-2020

Rumah yang dibina untuk isi rumah miskin, berpendapatan rendah dan sederhana²

2.0

Nisbah katil hospital bagi setiap 1,000 penduduk

1:450

Nisbah doktor kepada penduduk

8
minit

Pengoptimuman masa respons kecemasan

Menjadikan negara lebih selamat dan terjamin

Menggalakkan nilai murni dan gaya hidup aktif

60.0%

Persepsi rasa selamat

342
kes

Kes jenayah indeks bagi setiap 100,000 penduduk (paras)

8
minit

Pengoptimuman masa respons polis

6,800

Bilangan sekolah menubuhkan Kelab Rukun Negara

50.0%

Peratusan rakyat Malaysia membudayakan sukan



Sasaran Asal



Sasaran Dipinda



Sasaran Baharu

Nota: ¹ MyWI bukan sebahagian daripada sasaran terpilih.

² Berdasarkan Buku Harapan, sasaran untuk membina 1 juta rumah dalam 2 penggal (2018-2028).

Bidang Keutamaan A: Memperkukuh Inklusiviti ke arah Masyarakat yang Saksama

Objektif utama pembangunan inklusif adalah menangani ketidaksamarataan sosioekonomi bagi menambah baik integrasi sosial dan menggalakkan perpaduan yang lebih erat. Bagi tujuan ini, Kerajaan komited untuk meningkatkan pendapatan dan kuasa beli rakyat melalui langkah yang membolehkan lebih banyak penyertaan dalam aktiviti ekonomi. Di samping itu, langkah akan diambil untuk menangani keperluan kanak-kanak, belia, wanita, warga emas, orang kurang upaya (OKU) dan keluarga. Dalam tempoh akhir Rancangan, empat strategi utama untuk memperkukuh inklusiviti akan dilaksana seperti berikut:



Strategi A1: Meningkatkan Pendapatan dan Kuasa Beli Isi Rumah B40

Dalam tempoh akhir Rancangan, beberapa inisiatif akan dilaksana bagi meningkatkan pendapatan dan kuasa beli isi rumah B40 dan mengurangkan ketidaksamarataan sosioekonomi. Inisiatif tersebut bertujuan untuk meningkatkan kapasiti dan keupayaan isi rumah ini supaya dapat meningkatkan peluang mendapatkan pekerjaan, menggalakkan keusahawanan dan meningkatkan produktiviti. Di samping itu, langkah untuk meningkatkan sistem perlindungan sosial akan dilaksana bagi memastikan kualiti hidup golongan ini tidak terjejas dalam menghadapi ketidakpastian sosioekonomi. Sementara itu, penerimgunaan Indeks Kemiskinan Pelbagai Dimensi (MPI) akan membantu memperlengkap dan memperkukuh sistem penyampaian dan pemantauan inisiatif ini.

Usaha untuk meningkatkan kesejahteraan isi rumah B40 akan diperkukuh dengan mengambil kira keperluan khusus dalam pelbagai dimensi bagi setiap subkumpulan pendapatan. Pendekatan ini perlu kerana setiap subkumpulan pendapatan mempunyai ciri dan keperluan yang berbeza. Subkumpulan pendapatan isi rumah B40 adalah seperti ditunjukkan dalam *Paparan 11-2*.


Meningkatkan pendapatan isi rumah miskin dan berpendapatan rendah

Dalam tempoh akhir Rancangan, bantuan akan terus diberikan kepada kumpulan isi rumah miskin dan berpendapatan rendah untuk meningkatkan pendapatan, kuasa beli dan kesejahteraan hidup. Sehubungan itu, program peningkatan pendapatan serta penyediaan keperluan asas yang meliputi aspek perumahan, pendidikan dan kesihatan akan terus dilaksana. Akses kepada pendidikan dan latihan kemahiran akan diperkukuh sebagai inisiatif utama dalam peningkatan mobiliti sosial. Di samping itu, bantuan pendidikan seperti Kumpulan Wang Amanah Pelajar Miskin, Rancangan Makanan Tambahan dan Biasiswa Kecil Persekutuan akan diperluas bagi meringankan beban isi rumah miskin dan berpendapatan rendah. Pada masa yang sama, skim pembiayaan mikro kredit dan program bimbingan usahawan juga akan diteruskan bagi menggalakkan isi rumah miskin dan berpendapatan rendah menceburi bidang perniagaan.



Paparan 11-2

Kategori Pendapatan dan Subkumpulan Pendapatan Isi Rumah B40, 2016



Nota: Berdasarkan Penyiasatan Pendapatan Isi Rumah & Kemudahan Asas (PIR & KA) 2016, pendapatan penengah bulanan isi rumah nasional ialah sebanyak RM5,228. Masyarakat kelas menengah merujuk kepada isi rumah berpendapatan pertengahan yang memperoleh pendapatan antara separuh dan dua kali pendapatan penengah bulanan isi rumah nasional (RM2,614 – RM10,456).

Meningkatkan keupayaan mendapat pekerjaan

Dalam meningkatkan keupayaan isi rumah B40 mendapatkan pekerjaan terutama bagi pekerjaan berpendapatan tinggi, keutamaan akan diberi untuk membina kapasiti dan keupayaan melalui pendidikan dan latihan kemahiran. Sehubungan itu, akses kepada pendidikan berkualiti dalam kalangan pelajar daripada isi rumah B40 akan dipertingkatkan pada semua peringkat iaitu pendidikan awal, rendah, menengah dan tertiar. Usaha untuk meningkatkan akses kepada pendidikan awal termasuk menyediakan lebih banyak pusat penjagaan dan pendidikan awal kanak-kanak (ECCE) dan pendidikan prasekolah pada kos yang berpatutan. Usaha ini akan membantu kanak-kanak daripada kalangan isi rumah B40 bersedia untuk mengikuti pendidikan formal.

Selain itu, pelajar daripada kalangan isi rumah B40 akan diberi lebih keutamaan untuk memasuki Maktab Rendah Sains MARA dan Sekolah Berasrama Penuh. Langkah ini merupakan penambahbaikan dengan mengambil kira latar belakang sosioekonomi berbanding amalan semasa yang hanya berasaskan merit. Sementara itu, kelayakan khas kemasukan, kuota kemasukan dan kemudahan kewangan akan terus diberi kepada pelajar daripada kalangan isi rumah B40 yang memenuhi syarat minimum untuk melanjutkan pengajian ke peringkat lebih tinggi dan menjalani kursus profesional. Di samping itu, isi rumah B40 akan digalakkan untuk menyertai Program Pendidikan dan Latihan Teknikal dan Vokasional (TVET) bagi meningkatkan tahap kemahiran.

Menggalakkan keusahawanan

Bagi menggalakkan keusahawanan, Kementerian Pembangunan Usahawan (MED) telah ditubuhkan semula untuk menerajui program pembangunan keusahawanan secara menyeluruh dan bersepadu. Program ini meliputi latihan khusus untuk isi rumah B40 meneroka peluang perniagaan dalam talian, termasuk penggunaan platform media sosial dan mekanisme mudah perbankan sebagai kaedah mempromosikan e-usahawan. Di samping itu, penekanan akan diberikan terhadap latihan penyimpanan rekod kewangan dan dokumentasi urus niaga yang betul bagi membolehkan usahawan dalam kalangan isi rumah B40 menyimpan rekod kewangan dengan lebih baik. Penyimpanan rekod adalah penting untuk usahawan mendapatkan pinjaman daripada institusi kewangan. Semua program latihan keusahawanan akan menerapkan aspek perubahan minda untuk membina sikap berdikari dan sifat keusahawanan.

Lebih banyak ruang pemasaran akan disediakan menerusi pusat sehenti dan tapak perniagaan sementara seperti pasar tani serta fasiliti bergerak termasuk *agro-caravan* dan *food truck*. Pada masa yang sama, ekonomi perkongsian⁴ dan keusahawanan sosial⁵ akan terus digalakkan, terutama di kawasan yang mempunyai peluang pekerjaan terhad. Langkah penguatkuasaan juga akan dipertingkatkan untuk mengawal kegiatan perniagaan warga asing yang mengambil peluang usahawan B40.

Meningkatkan produktiviti

Penggunaan teknologi dan amalan terbaik akan terus digalakkan dalam kalangan isi rumah B40 untuk meningkatkan produktiviti dan menjana lebih pendapatan. Isi rumah terutama yang terlibat dalam aktiviti pertanian dan perikanan akan digalakkan untuk memanfaatkan

teknologi bagi meningkatkan produktiviti. Sementara itu, pekebun kecil getah dan kelapa sawit akan digalakkan untuk menggabungkan aktiviti menerusi pengurusan berasaskan komuniti bagi menjamin jualan secara pukal untuk menikmati faedah ekonomi bidangan.

Meningkatkan sistem perlindungan sosial

Satu rangka kerja bagi sistem perlindungan sosial bersepadu dan komprehensif akan diwujudkan dalam meningkatkan perlindungan dan kesejahteraan, khususnya isi rumah B40. Pelaksanaan program perlindungan sosial oleh pelbagai agensi akan diselaraskan melalui majlis di peringkat pusat. Majlis tersebut akan mendapatkan maklumat daripada pelbagai pangkalan data dan dibantu oleh input daripada industri dan akademik. Di samping itu, analisis data raya akan diguna untuk menjana maklumat bernilai dan memberi gambaran yang jelas bagi meningkatkan tahap lantai perlindungan sosial⁶. Penentuan penerima yang layak mendapat bantuan akan ditambah baik supaya lebih berasaskan keperluan termasuk faktor sosiodemografi dan geografi. Selain itu, beberapa mekanisme akan dikenal pasti untuk memperluas perlindungan keselamatan sosial kepada isi rumah yang bekerja dalam sektor tidak formal.

Menambah baik pengukuran kemiskinan

Model Pendapatan Garis Kemiskinan (PGK) semasa akan dikaji semula untuk lebih menggambarkan corak penggunaan dan keperluan serta demografi semasa isi rumah. Sementara itu, MPI akan diguna sebagai pelengkap kepada PGK ke arah pengukuran kemiskinan yang lebih inklusif selaras dengan amalan antarabangsa. Model MPI Malaysia bukan sahaja mengambil kira dimensi pendidikan, kesihatan dan taraf hidup tetapi juga pendapatan. Maklumat lanjut adalah seperti ditunjukkan dalam *Kotak 11-1*.

⁴ Ekonomi perkongsian merujuk kepada aktiviti penyewaan jangka pendek bagi lebihan barangan atau perkhidmatan yang tidak digunakan oleh pemilik untuk menjana pendapatan.

⁵ Keusahawanan sosial merujuk kepada entiti yang menjalankan misi sosial dengan menggunakan model perniagaan yang mampan. Entiti ini berhasrat untuk memberikan impak yang mampan bagi meningkatkan kesejahteraan masyarakat dalam aspek ekonomi, sosial dan alam sekitar.

⁶ Pusat Penyelidikan Kesejahteraan Sosial, Universiti Malaya mendefinisikan lantai perlindungan sosial sebagai beberapa set jaminan asas perlindungan sosial bertujuan untuk mencegah atau membasmi kemiskinan, keadaan mudah terjejas dan peminggiran sosial menurut definisi peringkat nasional.



Kotak 11-1

Indeks Kemiskinan Pelbagai Dimensi

Indeks Kemiskinan Pelbagai Dimensi (MPI) akan melengkapi Pendapatan Garis Kemiskinan (PGK) untuk mengukur dan memantau kemiskinan dalam perspektif pelbagai dimensi. Berbeza dengan PGK yang mengukur kemiskinan mutlak hanya berdasarkan dimensi pendapatan, MPI pula mengukur kemiskinan dalam pelbagai dimensi. MPI mencerminkan insiden ketersisihan pelbagai dimensi (jumlah isi rumah yang mengalami ketersisihan dalam pelbagai aspek kehidupan pada tempoh tertentu dalam

populasi tertentu) dan ketersisihan (bilangan ketersisihan purata yang dialami oleh isi rumah pada tempoh tertentu). Indeks ini membolehkan analisis dilaksana berdasarkan insiden dan intensiti yang sekali gus dapat mengenal pasti jurang pembangunan dengan lebih jelas. Analisis ini membolehkan pihak berkepentingan membangunkan intervensi yang lebih bersepadu bagi meningkatkan pendapatan dan kesejahteraan kumpulan sasaran

Insiden dan Agihan Ketersisihan, 2014 dan 2016 (% isi rumah)

Dimensi	Indikator	Garis Ketersisihan	Insiden Ketersisihan (%)		Agihan Ketersisihan (%)			
			Nasional		Bandar		Luar Bandar	
			2014	2016	2014	2016	2014	2016
Pendidikan	Jumlah tahun persekolahan	Semua ahli isi rumah berumur antara 13 hingga 60 tahun mempunyai kurang daripada 6 tahun persekolahan	1.13	1.22	0.59	0.72	0.54	0.50
	Kehadiran ke sekolah	Kanak-kanak di umur persekolahan (berumur 6-16) yang tidak bersekolah	0.60	0.42	0.42	0.30	0.18	0.12
Kesihatan	Akses kepada kemudahan penjagaan kesihatan	Jarak ke kemudahan kesihatan melebihi 5 kilometer dan tiada kemudahan kesihatan bergerak disediakan	5.84	6.84	1.85	3.12	3.99	3.72
	Akses kepada air bersih	Selain daripada bekalan air paip terawat dalam rumah dan paip air/pili awam	4.90	4.07	0.95	0.73	3.95	3.34
Taraf Hidup	Keadaan tempat kediaman	Usang atau mulai rosak	3.03	2.88	1.54	1.52	1.49	1.36
	Kesesakan bilik (bilangan bilik tidur)	Melebihi 2 ahli isi rumah bagi setiap bilik tidur	14.01	12.03	9.13	7.92	4.88	4.11
	Kemudahan tandas	Selain tandas curah atau tandas tarik	0.50	0.34	0.17	0.15	0.33	0.19
	Kemudahan kutipan sampah	Tiada kemudahan kutipan sampah	16.15	14.95	5.07	4.78	11.08	10.17
	Pengangkutan	Kesemua ahli isi rumah tidak menggunakan pengangkutan persendirian atau pengangkutan awam	0.34	0.46	0.19	0.26	0.15	0.20
	Peralatan komunikasi asas	Tidak mempunyai telefon talian tetap atau telefon bimbit secara konsisten	1.65	1.44	0.85	0.70	0.80	0.74
Pendapatan	Pendapatan purata bulanan isi rumah	Pendapatan purata bulanan isi rumah kurang daripada PGK	0.64	0.36	0.26	0.13	0.38	0.23
Keseluruhan			32.57	30.51	17.10	16.52	15.47	13.98

- Insiden ketersisihan keseluruhan di peringkat nasional telah bertambah baik daripada 32.57% pada tahun 2014 kepada 30.51% pada tahun 2016. Pada tahun 2014 dan 2016, agihan ketersisihan menunjukkan kejadian ketersisihan adalah lebih tinggi di kawasan bandar berbanding kawasan luar bandar
- Insiden ketersisihan dalam kebanyakan indikator telah bertambah baik dalam tempoh 2014-2016, kecuali bagi tiga indikator iaitu akses kepada kemudahan kesihatan, jumlah tahun persekolahan dan pengangkutan. Ini menunjukkan langkah pembasmian kemiskinan telah dilaksana secara berkesan berdasarkan keperluan isi rumah
- Indikator yang mempunyai insiden ketersisihan tertinggi pada tahun 2016 ialah kemudahan kutipan sampah, diikuti oleh kesesakan bilik (bilangan bilik tidur), akses kepada kemudahan penjagaan kesihatan dan akses kepada air bersih. Ini menunjukkan indikator ini memerlukan intervensi susulan bagi membasmi kemiskinan pelbagai dimensi

Insiden Kemiskinan Pelbagai Dimensi, Intensiti Ketersisihan dan Indeks Kemiskinan Pelbagai Dimensi (MPI), 2014 dan 2016

Wilayah/Strata	Insiden Kemiskinan Pelbagai Dimensi (H)%		Purata Intensiti Ketersisihan Isi Rumah Miskin Pelbagai Dimensi (A)%		Indeks Kemiskinan Pelbagai Dimensi (M) ¹	
	2014	2016	2014	2016	2014	2016
Nasional	1.10	0.86	39.66	38.90	0.0044	0.0033
Strata						
Bandar	0.19	0.13	39.02	38.64	0.0007	0.0005
Luar Bandar	4.14	3.50	39.75	38.94	0.0165	0.0136
Wilayah						
Semenanjung Malaysia	0.25	0.19	37.72	36.89	0.0010	0.0007
Sabah & W.P. Labuan	6.34	4.95	42.55	41.70	0.0270	0.0206
Sarawak	4.82	3.76	37.41	36.77	0.0180	0.0138

Nota: ¹ M = H% x A%, M ialah indeks yang mempunyai nilai antara 0 hingga 1, dengan nilai "1" bermaksud tersisih sepenuhnya, manakala "0" tiada ketersisihan.

- Pada peringkat nasional, insiden kemiskinan pelbagai dimensi telah berkurangan daripada 1.10% pada tahun 2014 kepada 0.86% pada tahun 2016. Purata intensiti ketersisihan juga berkurang daripada 39.66% kepada 38.9% dalam tempoh yang sama
- Kebanyakan isi rumah miskin pelbagai dimensi mengalami ketersisihan dalam indikator kemudahan kutipan sampah, kesesakan bilik (bilangan bilik tidur) dan akses kepada kemudahan penjagaan kesihatan



- MPI telah berkurangan daripada 0.0044 pada tahun 2014 kepada 0.0033 pada tahun 2016. Pengurangan ini menunjukkan program pembasmian kemiskinan telah dilaksanakan dengan berkesan dan mengambil kira aspek pelbagai dimensi
- MPI mengesahkan bahawa bukan sahaja bilangan isi rumah miskin pelbagai dimensi telah berkurangan pada tahun 2016, kualiti hidup golongan miskin juga telah bertambah baik seperti ditunjukkan oleh pengurangan dalam purata intensiti ketidbersihan dalam pelbagai dimensi

Perbezaan antara Insiden Kemiskinan Mutlak dan Insiden Kemiskinan Pelbagai Dimensi, 2014 dan 2016

Wilayah/Strata	Insiden Kemiskinan Mutlak ¹ %		Insiden Kemiskinan Pelbagai Dimensi (H) ² %	
	2014	2016	2014	2016
Nasional	0.64	0.36	1.10	0.86
Strata				
Bandar	0.34	0.17	0.19	0.13
Luar Bandar	1.65	1.04	4.14	3.50
Wilayah				
Semenanjung Malaysia	0.32	0.11	0.25	0.19
Sabah & W.P. Labuan	3.91	2.82	6.34	4.95
Sarawak	0.95	0.61	4.82	3.76

Nota: ¹ Insiden kemiskinan mutlak diukur menggunakan PGK.

² Isi rumah dianggap miskin pelbagai dimensi sekiranya isi rumah tersebut mengalami ketidbersihan sekurang-kurangnya 30% daripada indikator berwujud.

- Insiden kemiskinan mutlak dan insiden kemiskinan pelbagai dimensi telah bertambah baik antara tahun 2014 dan 2016
- Walau bagaimanapun, insiden kemiskinan pelbagai dimensi adalah lebih tinggi berbanding insiden kemiskinan mutlak kerana insiden kemiskinan pelbagai dimensi turut mengambil kira dimensi bukan pendapatan. Namun, terdapat pengecualian di kawasan bandar yang mana insiden kemiskinan mutlak adalah lebih tinggi daripada insiden kemiskinan pelbagai dimensi disebabkan oleh akses kepada pendidikan, penjagaan kesihatan, air bersih dan kemudahan lain yang lebih baik

Strategi A2: Memperkukuh Komuniti Ekonomi Bumiputera (BEC)

Cabaran dalam meningkatkan Komuniti Ekonomi Bumiputera (BEC) adalah termasuk bilangan penyertaan yang rendah dalam pekerjaan mahir dan profesional, pemilikan ekuiti korporat yang rendah serta kekangan kapasiti dan keupayaan untuk bersaing di pasaran terbuka. Sehubungan itu, Kerajaan komited untuk meneruskan agenda Bumiputera pada peringkat nasional melalui pelaksanaan dasar dan inisiatif inklusif, termasuk penekanan terhadap perubahan minda. Selain itu, tumpuan akan diberi kepada penerapan nilai moral dan etika yang baik seperti bekerja bersungguh-sungguh, berdisiplin dan berdikari dalam meningkatkan status sosioekonomi serta memastikan kejayaan BEC. Agenda Bumiputera merupakan salah satu agenda nasional yang penting untuk memastikan inklusiviti dan kesejahteraan ekonomi rakyat. Dalam tempoh akhir Rancangan, usaha akan dipergiat untuk memperkukuh keberkesanan institusi dan program Bumiputera, memperkasa pendidikan dan modal insan serta meningkatkan kawalan efektif dan kemampunan dalam pemilikan ekuiti korporat. Di samping itu, usaha akan diambil untuk meningkatkan pemilikan kekayaan dan membina BEC yang berdaya tahan dan mampan.

Kongres Masa Depan Bumiputera dan Negara 2018 (KBN 2018) yang telah diadakan pada bulan September 2018 menjadi platform penting kepada Kerajaan baharu untuk memperbaharui agenda pemerikasaan Bumiputera. Kongres tersebut telah menghasilkan 63 resolusi di bawah empat bidang fokus, iaitu nilai etika dan moral; penciptaan dan pemilikan kekayaan; perniagaan dan keusahawanan; dan pendidikan dan modal insan. Kerajaan akan mengkaji dan memperhalusi pelaksanaan resolusi ini ke dalam pelan tindakan jangka pendek, sederhana dan panjang.

Memperkukuh keberkesanan institusi dan program

Dalam meningkatkan tadbir urus dan penyampaian perkhidmatan institusi Bumiputera, pelantikan lembaga pengarah dan pengurusan tertinggi organisasi pembangunan keusahawanan (EDO) dan syarikat milik Kerajaan (SOE) akan dibuat berdasarkan pengalaman, merit dan kelayakan. Peranan strategik dan model perniagaan EDO

dan SOE juga akan disemak semula, sementara prestasi institusi ini akan dinilai berdasarkan fungsi yang dimandatkan dan petunjuk prestasi utama berasaskan outcome. Selain itu, peranan dan fungsi agensi Bumiputera seperti Unit Peneraju Agenda Bumiputera (TERAJU), Ekuiti Nasional Berhad (EKUINAS) dan Majlis Amanah Rakyat (MARA) akan diselaras untuk memperkukuh penyampaian agenda Bumiputera. Sementara itu, penubuhan semula MED pada tahun 2018 akan memperkukuh penyampaian dan penyelarasan program keusahawanan di seluruh negara, termasuk untuk Bumiputera.

Perusahaan Bumiputera akan terus menerima bantuan berdasarkan merit dan pertimbangan perniagaan, sekaligus menghapuskan sokongan politik. Di samping itu, portal sehati yang interaktif akan dibangun untuk memudahkan BEC mengakses maklumat dan perkhidmatan yang disediakan oleh Kerajaan, terutama berkaitan pendidikan dan latihan, keusahawanan serta hartanah. Portal ini juga akan membantu Kerajaan untuk membangunkan program yang lebih baik berdasarkan keperluan serta mengelak pemberian pelbagai faedah kepada penerima yang sama.

Memperkasa pendidikan dan modal insan

Usaha akan dipergiat untuk memperkasa modal insan Bumiputera dengan menyediakan lebih banyak peluang untuk pendidikan dan latihan. Sehubungan itu, akses kepada pendidikan yang berkualiti dalam kalangan pelajar Bumiputera daripada latar belakang keluarga yang berpendapatan rendah dan mempunyai persekitaran mencabar akan dipertingkatkan. Program bantuan pendidikan seperti biasiswa, program pemupukan dan pembangunan serta bimbingan akan diteruskan. Sementara itu, usaha untuk menyediakan lebih banyak pusat ECCE dan pendidikan prasekolah akan dipergiat dengan memberi tumpuan kepada kanak-kanak daripada isi rumah B40, terutama dalam kalangan Bumiputera. Dari segi peningkatan latihan, Yayasan Peneraju Pendidikan Bumiputera (YPPB) akan mewujudkan kerjasama dengan pelbagai pihak berkepentingan untuk melaksanakan program latihan pada peringkat menengah dalam bidang sains, teknologi, kejuruteraan dan matematik (STEM). Program ini bertujuan untuk memupuk minat dan membolehkan pelajar Bumiputera memperoleh pengetahuan



dan kemahiran berkaitan STEM, terutama dalam kemunculan Revolusi Perindustrian Keempat (4IR). Langkah bersepadu ini akan meningkatkan penyertaan Bumiputera dalam tenaga buruh, terutama dalam pekerjaan bergaji tinggi.

Modul keusahawanan dan kemahiran insaniah akan dijadikan sebahagian daripada program latihan di institusi seperti GIATMARA dan Kolej Kemahiran Tinggi MARA (KKTMM) untuk meningkatkan kebolehpasaran dan mewujudkan BEC yang lebih kompetitif. Antara modul kemahiran insaniah yang akan dilaksana adalah kemahiran interpersonal dan komunikasi serta penguasaan bahasa Inggeris. Kaedah pemilihan termasuk ujian psikometrik akan diguna untuk memadamkan minat dan kecenderungan pelatih Bumiputera dengan program latihan yang sesuai. Di samping itu, program latihan industri berstruktur dengan persijilan antarabangsa akan ditawarkan oleh institusi latihan kemahiran.

Penekanan juga akan diberi ke arah menggalakkan lebih ramai Bumiputera memperoleh akreditasi profesional. Sehubungan itu, MARA dan YPPB akan terus melaksana program akreditasi profesional untuk meningkatkan jumlah profesional Bumiputera seperti akauntan, penganalisis kewangan dan pengurus risiko kewangan. Dalam menyokong inisiatif ini, sumber dana alternatif akan diteroka menerusi kerjasama strategik antara agensi, SOE dan sektor swasta. Di samping itu, inisiatif untuk menghasilkan individu berkemahiran teknikal dan profesional dalam kalangan *huffaz*⁷ akan dipergiat. Oleh itu, institusi latihan Bumiputera akan membangunkan sistem pembelajaran yang bersepadu dan seimbang berdasarkan Al-Quran dan Sunnah untuk mempersiapkan *huffaz* dengan pengetahuan dan kemahiran yang diperlukan bagi meningkatkan kebolehpasaran *huffaz*.

Meningkatkan kawalan efektif dan kemampanan dalam pemilikan ekuiti korporat

Institusi Bumiputera akan terus memainkan peranan penting dalam meningkatkan kawalan efektif dan kemampanan pemilikan ekuiti korporat. Penekanan akan diberi untuk menggalakkan lebih banyak penyertaan Bumiputera dalam pelaburan strategik dengan

pulangan yang lebih tinggi ke arah mencapai sasaran sekurang-kurangnya 30% pemilikan ekuiti korporat. Dalam hal ini, institusi Bumiputera akan terus melabur dalam syarikat yang mempunyai pertumbuhan tinggi dan syarikat tersenarai di Bursa Malaysia serta meneroka peluang melabur dalam syarikat berpotensi sebagai pemegang saham minoriti. Institusi Bumiputera juga akan meneroka dan melabur dalam industri halal dengan kerjasama pihak berkepentingan yang berkaitan. Di samping itu, inisiatif untuk menggalakkan syarikat Bumiputera yang berpotensi untuk disenaraikan di Bursa Malaysia akan diteruskan. Selain itu, insentif kewangan baharu akan ditawarkan kepada perusahaan kecil dan sederhana (PKS) Bumiputera yang berkelayakan untuk disenaraikan di *Leading Entrepreneur Accelerator Platform* di Bursa Malaysia.

SOE akan memperoleh pegangan saham bagi mendapatkan kawalan ke atas syarikat Bumiputera yang berpotensi, khususnya dalam industri yang mempunyai nilai ditambah yang tinggi dan baru muncul. Kawalan ini bertujuan untuk memacu prestasi dan meningkatkan nilai syarikat sebelum pegangan tersebut dilupuskan kepada pelabur Bumiputera yang berpotensi. Sehubungan itu, pasukan kepimpinan dan pengurusan berwibawa dengan penetapan minda yang bersesuaian akan dilantik dalam syarikat yang dikenal pasti untuk memastikan sasaran tercapai. Bantuan kewangan dan khidmat nasihat perniagaan akan disediakan bagi menyokong inisiatif ini. Sementara itu, SOE akan terus melabur dalam syarikat yang berkembang pesat dan tersenarai di Bursa Malaysia bagi memperoleh kawalan yang berkesan dalam syarikat berkenaan. Langkah ini akan membolehkan SOE melaksana inisiatif dan program yang berkesan dan memberi faedah kepada Bumiputera. Selain itu, SOE yang terpilih akan mempergiat aktiviti *management buy-out* untuk meningkatkan pemilikan ekuiti Bumiputera.

Agensi amanah Bumiputera seperti Permodalan Nasional Berhad (PNB) dan Pelaburan MARA Berhad akan mengenal pasti lebih banyak produk kewangan yang inovatif supaya dapat memberi pulangan yang menarik dan lebih tinggi kepada pemegang unit amanah saham Bumiputera. Di samping itu, PNB akan terus melabur dalam instrumen yang dapat memberi pulangan yang

⁷ Orang Islam yang telah menghafal keseluruhan Al-Quran.

tinggi serta meningkatkan pelaburan dalam aset persendirian dan global untuk menjana pulangan yang mampan dan berdaya saing kepada pemegang saham, khususnya Bumiputera. Amanah Saham Nasional Berhad yang diuruskan oleh PNB juga akan melabur dalam sektor hartanah bagi mempelbagai portfolio pelaburan.

Meningkatkan pemilikan kekayaan

Dalam mempertingkat pemilikan kekayaan Bumiputera, usaha bersepadu akan dilaksana untuk meningkatkan aset bukan kewangan dalam bentuk hartanah komersial, industri dan kediaman terutama di lokasi utama dan strategik. Sehubungan itu, Pelaburan Hartanah Berhad (PHB) akan menambah saiz dana Amanah Hartanah Bumiputera (AHB) untuk memiliki dan membangunkan lebih banyak hartanah komersial dan projek pembangunan bercampur bagi memberi pulangan pelaburan yang lebih baik kepada pelabur. PHB juga akan membangunkan model perniagaan baharu berasaskan kepada perkongsian strategik dengan institusi kewangan, rakan kongsi projek dan EDO untuk memperoleh premis perniagaan yang strategik, terutama di pusat bandar. Premis tersebut akan disewakan kepada usahawan Bumiputera dengan pilihan untuk dibeli.

Jabatan Wakaf, Zakat dan Haji (JAWHAR) akan menyediakan rangka kerja menyeluruh bagi meneroka potensi pembangunan tanah wakaf melalui kerjasama dengan Yayasan Waqaf Malaysia, majlis agama Islam negeri (MAIN) dan kerajaan negeri. Di samping itu, wakaf dalam bentuk sumbangan wang tunai akan terus ditingkatkan melalui sumbangan dana awam, manakala sijil wakaf akan dikeluarkan terutama untuk meningkatkan penyertaan masyarakat bagi menambah bilangan harta wakaf. Selain itu, garis panduan mengenai sukuk akan dikaji semula untuk memudahkan penjana dana bagi pembangunan tanah wakaf yang lebih baik.

Membina Komuniti Ekonomi Bumiputera (BEC) yang berdaya tahan dan mampan

Usaha untuk membina BEC yang lebih berdaya tahan dan mampan termasuk mengubah minda usahawan Bumiputera yang cenderung bergantung kepada bantuan Kerajaan. Antara usaha tersebut adalah mendorong sikap berdikari, menguatkuasakan dasar pemisah, menggalakkan budaya prestasi tinggi dan meningkatkan produktiviti

serta menyediakan bantuan berdasarkan merit dan keperluan. Di samping itu, usahawan akan digalakkan untuk bekerjasama dengan peserta industri lain untuk meletakkan perniagaan pada kedudukan yang lebih baik dan mampan dalam dan luar negara. Perkongsian antara usahawan Bumiputera dan bukan Bumiputera juga akan digalakkan untuk mewujudkan perniagaan yang tulen dan bukannya aktiviti manipulasi untuk mengaut keuntungan. Sementara itu, perkongsian strategik antara SOE dan pusat penyelidikan dan pembangunan dengan PKS Bumiputera juga akan dipergiat untuk meningkatkan penciptaan produk dan perkhidmatan yang inovatif.

Program pembangunan usahawan bersepadu akan terus dilaksana untuk menyokong pembentukan BEC yang berdaya tahan dan mampan. Dalam hal ini, institusi Bumiputera akan terus menyediakan bantuan, termasuk membeli atau mengambil alih dan membangunkan premis perniagaan untuk disewa oleh usahawan Bumiputera. Selain itu, pusat jualan berkonsepkan *souq* atau bazar akan dibangunkan, terutama di pusat bandar untuk memanfaatkan akses pasaran yang lebih besar dan meningkatkan penyertaan Bumiputera dalam aktiviti perniagaan. Pusat ini akan dipromosi sebagai pusat tarikan baharu kepada pelancong. Dalam menggalakkan lebih banyak Bumiputera menyertai industri strategik dan mempunyai nilai ditambah yang tinggi, EDO dan SOE akan terus membantu usahawan yang berpotensi termasuk belia untuk meneroka industri seperti minyak dan gas, automotif serta aeroangkasa dan pertahanan. Di samping itu, dana wakaf akan dimanfaatkan untuk meningkatkan penyertaan usahawan Bumiputera dalam aktiviti perniagaan termasuk industri halal. Inisiatif ini akan melengkapkan usaha Kerajaan dalam membiayai program keusahawanan Bumiputera.

Penyertaan usahawan Bumiputera dalam ekonomi digital akan terus dimudah cara menerusi pembangunan kapasiti dan peningkatan akses kepada dana. Bagi tujuan ini, lebih banyak program latihan, pembiayaan dan khidmat nasihat kepada usahawan Bumiputera akan diperkenalkan untuk meningkatkan penyertaan dalam e-dagang. Program ini juga akan memperluas capaian pasaran usahawan Bumiputera dengan memanfaatkan platform dalam talian. Di samping itu, platform sumbangan dana awam dalam talian yang boleh dipercayai akan dikaji sebagai mekanisme alternatif bagi membiayai perniagaan Bumiputera.



Garis panduan dan rangka kerja Program Pembangunan Vendor akan dikaji semula untuk mengukuhkan outcome program pembangunan usahawan Bumiputera yang kompetitif, mampan dan berprestasi tinggi dalam pasaran domestik dan global. Kajian ini termasuk memperkukuh kriteria pemilihan dan modul latihan serta melaksana dasar pemisah yang ketat pada pelbagai peringkat perniagaan. Sementara itu, dasar *carve-out and compete* ke atas kontrak akan dipertingkatkan untuk memastikan penyertaan yang berkesan oleh syarikat Bumiputera dalam projek besar Kerajaan dan di sepanjang rantai bekalan yang berkaitan. Di samping itu, syarat yang ketat akan dilaksana dalam pemberian kontrak Kerajaan dan permit eksport dan import (AP) termasuklah mengkaji proses pemilihan dan memperkukuh mekanisme pemantauan serta memperkenalkan undang-undang yang berkaitan. Langkah ini bertujuan untuk memastikan peluang yang diberi kepada Bumiputera diusahakan dengan sewajarnya. Kerajaan akan mengambil tindakan yang tegas termasuklah membatalkan secara automatik pemberian kontrak dan AP sekiranya dijual atau dipindah milik kepada orang lain.

Usaha akan dipergiat untuk memperkemas inisiatif dalam menggalakkan lebih banyak enterpris Bumiputera berskala mikro dan kecil untuk beralih ke tahap yang lebih tinggi. Inisiatif ini akan dilaksana dengan memanfaatkan kerjasama dalam kalangan EDO untuk meningkatkan keupayaan dan kebolehan usahawan. Bagi menyokong inisiatif ini, insentif dan bantuan yang sesuai termasuk khidmat nasihat dan pembiayaan perniagaan akan disediakan kepada usahawan yang berpotensi. Sementara itu, dasar peluang kedua akan diperkenalkan untuk membantu usahawan Bumiputera yang pernah gagal disebabkan oleh keadaan luar jangka untuk meneruskan perniagaan. Bantuan ini bertujuan untuk mengatasi stigma kegagalan kali pertama yang menghindar usahawan daripada terus berkecimpung dalam perniagaan.

Strategi A3: Memperkasa Kumpulan Minoriti

Beberapa kumpulan minoriti terutama Orang Asli di Semenanjung Malaysia serta Anak Negeri Sabah dan Bumiputera Sarawak di kawasan pedalaman masih dibelenggu kemiskinan disebabkan ketinggalan dalam aspek pendidikan, kemahiran dan keusahawanan

berikutan akses yang terhad kepada peluang dan kemudahan asas. Sementara itu, masih terdapat isu berkaitan akses kepada peluang pekerjaan dan kemudahan pinjaman mikro untuk perniagaan bagi isi rumah India dan Cina yang berpendapatan rendah. Oleh itu, beberapa inisiatif akan dilaksana untuk memperkasa kumpulan minoriti ke arah mewujudkan masyarakat yang saksama.

Mengupayakan Orang Asli di Semenanjung Malaysia, Anak Negeri Sabah dan Bumiputera Sarawak

Dalam meningkatkan tahap pendidikan dan kemahiran, pengambilan pelajar berpotensi untuk kemasukan ke sekolah berprestasi tinggi akan dipertingkatkan bagi komuniti Orang Asli serta golongan yang tinggal di luar bandar dan pedalaman Sabah dan Sarawak. Keutamaan juga akan diberi untuk meningkatkan pengambilan pelajar dalam kalangan Orang Asli, Anak Negeri Sabah dan Bumiputera Sarawak ke institusi latihan kemahiran seperti KKTM dan Institut Kemahiran MARA. Sementara itu, program keusahawanan akan memberi fokus kepada pemupukan kemahiran keusahawanan dalam kalangan masyarakat Orang Asli, Anak Negeri Sabah dan Bumiputera Sarawak. Program tersebut akan direka bentuk berdasarkan bakat intrinsik kumpulan sasar dan akan dilengkapi dengan bantuan seperti kemudahan pembiayaan serta pembungkusan dan pemasaran produk. Sehubungan itu, program ini menyasarkan untuk mengoptimalkan penggunaan sumber asli dan meningkatkan status ekonomi kumpulan sasar. Di samping itu, proses pemberian hak milik tanah kepada Orang Asli, Anak Negeri Sabah dan Bumiputera Sarawak akan terus dipercepat bagi membolehkan golongan ini mengusahakan tanah tersebut. Langkah ini akan membolehkan tanah tersebut dapat dimanfaatkan untuk aktiviti ekonomi dengan bantuan daripada agensi yang berkaitan.

Meningkatkan taraf isi rumah India dan Cina yang berpendapatan rendah

Dalam usaha meningkatkan taraf isi rumah India dan Cina yang berpendapatan rendah, bantuan akan terus disalurkan melalui program isi rumah B40. Isi rumah India berpendapatan rendah akan digalakkan untuk memanfaatkan kemudahan pembiayaan mikro di bawah Skim Pembangunan Usahawan Masyarakat India bagi menceburi bidang perniagaan. Lebih banyak peluang akan diberikan kepada anak muda India untuk menyambung pelajaran ke peringkat yang

lebih tinggi dan menjalani program TVET bagi meningkatkan peluang mendapatkan pekerjaan. Sementara itu, bagi isi rumah Cina berpendapatan rendah di kampung baru, bantuan akan terus diberikan melalui skim pembiayaan mikro, bayaran premium tanah dan naik taraf rumah di bawah Skim Pinjaman Khas Penduduk Kampung Baru Cina, dengan lebih daripada 90% dana disalurkan untuk skim pembiayaan mikro.

Strategi A4: Menangani Keperluan Kumpulan Sasar Khusus

Pelbagai inisiatif akan terus diambil bagi menangani keperluan kumpulan sasaran khusus iaitu kanak-kanak, belia, wanita, warga emas, OKU dan keluarga. Inisiatif ini bertujuan untuk menyokong keperluan dan kepentingan kanak-kanak, membangun potensi belia, meningkatkan peranan wanita dalam pembangunan, menambah baik persekitaran kehidupan warga emas, memperkasa OKU dan memperkukuh institusi keluarga. Pelaksanaan inisiatif ini akan menyumbang kepada pengukuhan inklusiviti ke arah masyarakat yang saksama.

Menyokong keperluan dan kepentingan kanak-kanak

Kesejahteraan kanak-kanak akan dipertingkatkan bagi menyediakan persekitaran pembesaran yang lebih selamat dan sihat. Sehubungan itu, Pelan Hala Tuju Kesejahteraan Kanak-kanak sedang dirangka bagi menangani isu-isu kritikal seperti pemakanan, pendidikan, kemiskinan dan persekitaran termasuk perkara berkaitan penjagaan kanak-kanak. Pelan hala tuju ini juga akan menangani isu berkaitan hak dan perlindungan kanak-kanak terhadap keganasan, penderaan dan pengabaian. Selain itu, perkhidmatan penjagaan kanak-kanak bersubsidi akan diperluas kepada semua agensi kerajaan manakala insentif akan diberi kepada badan korporat yang menyediakan perkhidmatan ini. Sementara itu, kurikulum ECCE akan diperkemas bagi meningkatkan kualiti dan standard keseluruhan, seterusnya memperkukuh proses pembangunan kanak-kanak.

Membangun potensi belia

Pelbagai usaha akan diambil bagi mengasah bakat, meningkatkan jati diri dan menyemai nilai murni dalam kalangan belia. Program pembangunan dan pemerkasaaan belia akan diteruskan dengan fokus kepada bidang utama seperti pendidikan, kepimpinan, patriotisme dan kesukarelawanan. Usaha ini bertujuan untuk membentuk belia menjadi warganegara yang lebih berdaya tahan, berpengetahuan dan bertanggungjawab. Selain itu, langkah akan diperkukuh untuk menangani cabaran sosioekonomi yang dihadapi oleh belia melalui pewujudan lebih banyak peluang pekerjaan dan perniagaan, terutama melalui aktiviti keusahawanan dan penyediaan dana.

Meningkatkan peranan wanita dalam pembangunan

Pemerkasaaan wanita merupakan komponen penting di bawah agenda pembangunan inklusif, mengambil kira perbezaan sosioekonomi dan budaya. Selaras dengan ini, usaha bersepadu antara agensi kerajaan, sektor swasta dan organisasi berasaskan komuniti (CSO) akan diperkukuh dalam 13 teras strategik⁸ di bawah Dasar Wanita Negara. Sehubungan itu, hak dan kepentingan wanita akan terus dilindungi bagi memastikan program pembangunan dan inisiatif mengambil kira kesaksamaan gender. Penyertaan wanita dalam tenaga kerja akan dipertingkatkan dengan menggalakkan aturan kerja fleksibel serta inisiatif bekerja dari rumah dan kembali bekerja seperti portal *flexWorkLife* dan program *Career Comeback*. Selain itu, usaha sama antara agensi kerajaan dan pertubuhan sivil akan dipertingkatkan bagi mendidik wanita dan kanak-kanak perempuan terhadap kepentingan penjagaan kesihatan serta hak dan perlindungan wanita terhadap keganasan.

Menambah baik persekitaran kehidupan warga emas

Dalam menuju ke arah negara tua⁹ menjelang tahun 2030, pelbagai langkah akan diambil bagi memenuhi keperluan warga emas. Langkah ini termasuk memperkukuh program pembangunan komuniti sukarelawan dan inisiatif penuaan aktif bagi meningkatkan persekitaran kehidupan. Usaha untuk mempromosi kesedaran sosial

⁸ 13 teras strategik tersebut adalah ekonomi; kemiskinan; undang-undang; keganasan terhadap wanita; kesihatan; pendidikan dan latihan; sains dan teknologi; media; alam sekitar; sukan; agama, budaya, seni dan warisan; pembuatan keputusan dan politik; dan mekanisme, jentera dan institusi pembangunan.

⁹ Berdasarkan Dasar dan Pelan Tindakan Warga Emas Negara, negara tua didefinisikan sebagai negara yang mempunyai 15% populasi berumur 60 tahun dan ke atas.



dalam kesukarelawanan akan dipergiat bagi menggalak penyertaan komuniti terutama belia dalam aktiviti sukarela untuk warga emas. Inisiatif seperti komuniti mesra warga emas, pembelajaran sepanjang hayat dan konsep desa persaraan akan digalakkan sebagai sebahagian daripada usaha mempromosi penuaan aktif¹⁰. Inisiatif ini akan membolehkan warga emas menyumbang pengetahuan dan pengalaman kepada komuniti, meneruskan pembelajaran dan memperoleh pengetahuan dan kemahiran serta mempromosi kehidupan berdikari. Selain itu, langkah akan diambil untuk menggalakkan penyertaan warga emas dalam tenaga kerja serta memelihara kebajikan golongan tersebut. Di samping itu, kelayakan peringkat pendidikan tertiar berkaitan penjagaan geriatrik akan dipertingkatkan untuk melahirkan lebih ramai penjaga dan profesional yang bertauliah dalam bidang ini.

Memperkasa orang kurang upaya

Pembangunan dan peningkatan kualiti kehidupan dan kesejahteraan OKU adalah penting bagi menggalakkan inklusiviti dalam komuniti. Sehubungan itu, usaha untuk meningkatkan tahap kesedaran awam mengenai keperluan dan hak OKU akan dipergiat melalui program pendidikan dan kesedaran. Kajian semula yang menyeluruh akan dilaksana terhadap dasar dan perundangan berkaitan OKU termasuk menjadikan reka bentuk sejagat sebagai mandatori. Pelaksanaan kajian ini adalah melalui sesi libat urus dan rundingan dengan pihak berkepentingan termasuk pertubuhan sivil dan persatuan OKU. Kajian ini adalah bagi memastikan penguatkuasaan garis panduan reka bentuk sejagat terhadap bangunan awam dan swasta serta infrastruktur dapat dilaksanakan sewajarnya. Sementara itu, inisiatif bagi meningkatkan akses kepada bidang utama seperti pendidikan, TVET, penjagaan kesihatan dan pemulihan dalam komuniti juga akan diteruskan. Dasar pengambilan dan program pepadanan kerja akan ditambah baik bagi menggalakkan penyertaan OKU dalam tenaga kerja.

Memperkukuh institusi keluarga

Tumpuan yang lebih besar akan diberi untuk memperkukuh kesejahteraan institusi keluarga. Sehubungan itu, program pembangunan keibubapaan dalam bidang seperti kemahiran keibubapaan, perancangan keluarga dan kesihatan serta pengurusan kewangan akan diperkukuh bagi memberi tumpuan kepada kepentingan perkongsian peranan dan mempertingkatkan daya tahan keluarga terhadap cabaran sosioekonomi. Langkah percubaan yang berkaitan juga akan disemak bagi terus memperkukuh kesejahteraan institusi keluarga. Sementara itu, akses kepada perkhidmatan reproduktif dan kesihatan keluarga seperti pemeriksaan mammogram dan vaksinasi *human papilloma virus* (HPV) akan dipertingkatkan melalui kerjasama yang lebih meluas antara agensi kerajaan, komuniti dan pertubuhan bukan kerajaan (NGO). Selain itu, usaha untuk meningkatkan pembangunan sosial dan psikologi golongan remaja akan dimulakan daripada peringkat awal perkembangan kanak-kanak lelaki dan perempuan melalui pendidikan mengenai kepentingan peranan gender dan hak sosial.

Bidang Keutamaan B: Meningkatkan Kesejahteraan Rakyat

Kerajaan komited untuk memastikan pembangunan yang seimbang dalam aspek pertumbuhan ekonomi dan kesejahteraan rakyat. Sehubungan itu, usaha akan dipergiat untuk meningkatkan kualiti hidup bagi kesejahteraan rakyat yang lebih baik melalui pelaksanaan beberapa strategi dan inisiatif. Dalam tempoh akhir Rancangan, lima strategi utama untuk meningkatkan kesejahteraan rakyat akan dilaksana seperti berikut:

¹⁰ Berdasarkan Dasar dan Pelan Tindakan Warga Emas Negara, penuaan aktif merujuk kepada proses untuk mengoptimalkan peluang dan pendayaupayaan warga emas dalam keluarga dan masyarakat ke arah meningkatkan kesejahteraan hidup.



Strategi B1: Meningkatkan Kuasa Beli Rakyat

Kenaikan harga barangan dan perkhidmatan menyumbang kepada peningkatan kos sara hidup yang menjejaskan kuasa beli rakyat terutama dalam kalangan isi rumah B40. Mengambil kira situasi ini, inisiatif akan dilaksana untuk menangani herotan pasaran dengan menggalakkan lebih banyak persaingan yang mewujudkan lebih banyak ruang penawaran barangan dan perkhidmatan pada harga yang berpatutan dan kompetitif. Selain itu, penguatkuasaan ke atas peraturan kawalan harga dan tahap konsumerisme akan dipertingkat. Subsidi juga akan hanya diberi kepada kumpulan sasar bagi barangan asas terpilih berdasarkan prinsip keperluan. Semua inisiatif ini bertujuan untuk mengurangkan beban rakyat dalam menghadapi kos sara hidup yang meningkat.

Menangani herotan pasaran dengan menggalakkan lebih banyak persaingan

Persaingan adalah teras kepada pasaran yang dinamik dan cekap yang akan menggalakkan inovasi, meningkatkan produktiviti dan memperkukuh pertumbuhan ekonomi. Persaingan juga akan mendorong kepada kecekapan pasaran yang meningkatkan kepuasan dan kesejahteraan pengguna. Dalam tempoh akhir Rancangan, usaha akan diambil untuk menghapuskan pelbagai bentuk herotan pasaran supaya persaingan dapat dipertingkat untuk memastikan barangan dan perkhidmatan dapat disediakan kepada rakyat pada harga yang berpatutan dan mampu bayar. Sehubungan itu, jawatankuasa khas peringkat menteri akan mengkaji semula amalan monopoli serta hak dan keistimewaan, termasuk dalam pemberian konsesi dan perolehan Kerajaan. Kajian semula ini mensasarkan untuk mengembalikan persaingan yang adil dan menggalakkan kecekapan pasaran bagi melindungi kepentingan pengguna untuk mengurangkan beban kos sara hidup rakyat terutama dalam kalangan isi rumah B40.



Menyediakan lebih banyak ruang yang menawarkan barangan dan perkhidmatan pada harga yang berpatutan dan kompetitif

Subsidi ke atas barangan keperluan yang terpilih akan diteruskan walaupun usaha untuk meningkatkan kecekapan pasaran sedang dilaksana. Lebih banyak ruang yang menawarkan barangan dan perkhidmatan pada harga yang berpatutan akan disediakan untuk mengurangkan beban rakyat. Selain kedai yang dimiliki oleh syarikat dan milikan persendirian, koperasi akan digalakkan untuk mengendalikannya. Kedai harga patut untuk faedah ahli dan komuniti setempat. Pada masa yang sama, entiti wakaf dan koperasi juga akan menawarkan perkhidmatan pada harga yang berpatutan seperti penjagaan kesihatan primer, farmasi dan perhotelan. Kerajaan juga akan mengkaji pelbagai mod pelaksanaan subsidi petrol secara bersasar. Harga barangan bersubsidi antara Sabah dan Sarawak dengan Semenanjung Malaysia juga akan terus diseragamkan. Tambahan pula, pengenalan semula Cukai Jualan Dan Perkhidmatan (SST) bagi menggantikan Cukai Barang dan Perkhidmatan (GST) bertujuan untuk mengurangkan beban rakyat.

Mempergiatkan penguatkuasaan peraturan berkaitan kawalan harga

Penguatkuasaan peraturan berkaitan kawalan harga di bawah Akta Kawalan Harga dan Antipencatutan 2011 akan diteruskan untuk mencegah amalan pencatutan. Sehubungan itu, penguatkuasaan dan pemantauan harga akan terus dipertingkatkan. Sebagai tambahan, Skuad Tindakan Aduan dan Resolusi serta Skuad Tindakan Khas akan terus mempercepat proses penyelesaian aduan pengguna. Cadangan pewujudan ombudsman akan dikaji untuk memperkukuh perlindungan kepada pengguna. Sementara itu, Majlis Tindakan Sara Hidup Negara (NACCOL) telah ditubuhkan sebagai badan utama bagi menangani isu dan cabaran berkaitan peningkatan kos sara hidup yang menjejaskan kesejahteraan rakyat.

Mempertingkatkan tahap konsumerisme

Pengguna juga akan digalakkan untuk memainkan peranan yang lebih besar dalam melaporkan amalan perniagaan tidak beretika melalui pelbagai saluran termasuk Skuad Pengguna, persatuan pengguna, *Friends of KPDNHEP* dan sistem EZ Adu. Di samping itu, kesedaran

berkaitan konsumerisme yang lebih baik akan diterapkan dalam kalangan pelajar melalui Kelab Pengguna Sekolah dan Gerakan Pengguna Siswa. Selain itu, peranan persatuan pengguna akan diperkukuh untuk meningkatkan kesedaran dan menggalakkan perkongsian maklumat dalam kalangan pengguna bagi mempertingkatkan tahap konsumerisme. Dengan asas konsumerisme yang kukuh, pengguna tidak akan mudah terpedaya dengan golongan peruncit yang licik.

Strategi B2: Menyediakan Perumahan Mampu Milik dan Berkualiti

Penyediaan perumahan mampu milik dan berkualiti adalah penting untuk meningkatkan kualiti hidup isi rumah miskin, berpendapatan rendah dan sederhana. Dalam tempoh akhir Rancangan, Kerajaan akan terus memudah cara dan menyediakan persekitaran yang menggalakkan pembangunan perumahan mampu milik dengan penglibatan yang lebih luas daripada sektor swasta. Oleh itu, tumpuan akan diberi bagi memperkukuh pengurusan perumahan mampu milik, meningkatkan kemampuan dan akses kepada perumahan untuk isi rumah berpendapatan rendah dan sederhana serta menggalakkan penyediaan kemudahan yang mesra persekitaran untuk daya huni yang lebih baik.

Memperkukuh pengurusan perumahan mampu milik

Usaha untuk meningkatkan bilangan rumah mampu milik akan dipergiat melalui mekanisme perancangan dan pelaksanaan yang lebih baik. Majlis Perumahan Mampu Milik Negara akan ditubuhkan untuk mengawasi pelaksanaan perumahan mampu milik di seluruh negara. Sehubungan itu, sebanyak 200,000 unit rumah mampu milik disasarkan untuk dibina dalam tempoh akhir Rancangan, melibatkan program perumahan oleh agensi Kerajaan Persekutuan dan kerajaan negeri serta pemaju swasta. Kerjasama kerajaan negeri dan pihak berkuasa tempatan akan ditambah baik bagi membendung kenaikan kos pembinaan rumah mampu milik termasuk projek Program Perumahan Rakyat. Sebagai tambahan, pelbagai inisiatif perumahan mampu milik awam¹¹ oleh beberapa kementerian dan agensi akan dirasionalisasi di bawah Kementerian

¹¹ Inisiatif perumahan mampu milik awam merujuk kepada program di bawah Syarikat Perumahan Negara Berhad (SPNB) dan program lain seperti Perumahan Rakyat 1Malaysia (PR1MA), Perumahan Penjawat Awam Malaysia (dahulunya dikenali sebagai PPA1M), Rumah Mampu Milik Wilayah Persekutuan (RUMAWIP) dan Program Bantuan Rumah (PBR).

Perumahan dan Kerajaan Tempatan. Proses rasionalisasi ini akan membolehkan pelaksanaan program perumahan mampu milik dipercepat untuk manfaat rakyat.

Kajian semula ke atas subsidi bagi program perumahan mampu milik akan dilaksana untuk memastikan kemampuhan program serta mengoptimum sumber kerajaan dan mengurangkan pergantungan kepada peruntukan Kerajaan. Di samping itu, langkah akan dipergiat untuk meningkatkan penawaran perumahan mampu milik di atas tanah wakaf dan baitulmal. Sehubungan itu, JAWHAR akan meningkatkan kerjasama melalui inisiatif perkongsian pintar dengan MAIN, pemaju swasta dan institusi kewangan untuk membangunkan lebih banyak rumah mampu milik di atas tanah wakaf dan baitulmal.

Sistem Bank Data Perumahan Negara telah dibangunkan sebagai pangkalan data bersepadu bagi penawaran dan permintaan perumahan dalam negara. Sistem ini akan menambah baik pengumpulan data dengan menghubungkan pangkalan data pelbagai agensi persekutuan dan negeri seperti Pusat Maklumat Harta Tanah Negara (NAPIC), Jabatan Perangkaan Malaysia dan pemaju swasta. Sistem ini bertujuan untuk menambah baik perancangan dasar secara menyeluruh dan memantau pelaksanaan projek perumahan.

Meningkatkan akses kepada perumahan mampu milik untuk kumpulan sasaran

Selaras dengan objektif untuk meningkatkan kesejahteraan rakyat, usaha akan dipergiat untuk menyediakan perumahan mampu milik dan berkualiti serta meningkatkan pemilikan rumah. Sehubungan itu, insentif yang sesuai akan dipertimbang untuk pemaju yang menyediakan perumahan mampu milik, terutama untuk memenuhi permintaan isi rumah berpendapatan rendah dan sederhana. Pemaju perumahan akan digalakkan menggunakan teknologi seperti sistem binaan berindustri (IBS) dan mengguna pakai reka bentuk standard untuk perumahan mampu milik bagi mengurangkan kos. Institusi kewangan juga akan digalakkan untuk

menyediakan akses yang lebih baik kepada pembeli rumah pertama dengan memperkenalkan skim pembiayaan yang lebih fleksibel dan inovatif. Di samping itu, skim pembiayaan perumahan sedia ada akan ditambah baik untuk menyediakan penyelesaian yang mampan kepada isi rumah berpendapatan rendah dan sederhana untuk memiliki rumah mampu milik. Sehubungan itu, Program Sewa-Beli Rumah akan diperkukuh untuk meningkatkan pemilikan rumah bagi membolehkan kumpulan sasaran menyewa dan mempunyai pilihan untuk membeli rumah dalam tempoh penyewaan yang ditetapkan.

Menggalakkan penyediaan kemudahan yang mesra persekitaran untuk menambah baik daya huni

Usaha akan dipergiat untuk memastikan 1% daripada jumlah unit rumah mampu milik yang dibina bagi setiap projek perumahan awam disediakan kepada kumpulan sasaran khusus, terutama OKU, warga emas dan ibu tunggal. Pemaju swasta juga akan digalakkan untuk menerima pakai kadar agihan ini. Perancangan perumahan dan kawasan tempatan akan ditambah baik bagi mewujudkan masyarakat yang lebih cergas dan cemerlang. Penambahbaikan ini juga akan memastikan rumah mampu milik dibina berdekatan dengan terminal transit dan kemudahan awam untuk memudahkan mobiliti dan ketersambungan yang lebih baik. Sementara itu, lebih banyak kemudahan mesra persekitaran seperti taman dan ruang rekreasi akan dibina di sekitar kawasan perumahan yang berkepadatan tinggi.

Inisiatif akan dipergiat untuk menggalakkan budaya penyelenggaraan bagi memastikan rakyat menikmati persekitaran yang selesa dan berdaya huni. Kerja pembaikan dan penyelenggaraan utama di perumahan kos rendah dan sederhana awam dan swasta akan dipergiat menggunakan dana penyelenggaraan sedia ada¹², dengan syarat penghuni turut menampung sebahagian daripada kos kerja berkenaan. Selain itu, program dan kempen kesedaran akan dilaksana bagi memupuk rasa pemilikan bersama dan mengurangkan kejadian vandalisme terutama dalam kalangan penghuni perumahan awam.

¹² Dana penyelenggaraan awam sedia ada adalah Tabung Penyelenggaraan 1Malaysia bagi perumahan kos rendah dan sederhana swasta dan Program Penyelenggaraan Perumahan bagi perumahan kos rendah dan sederhana awam.



Strategi B3: Memperkukuh Sistem Penyampaian Penjagaan Kesihatan

Penyediaan penjagaan kesihatan yang berkualiti dengan kos berpatutan adalah penting bagi meningkatkan tahap kesihatan dan kesejahteraan rakyat secara menyeluruh. Dalam tempoh akhir Rancangan, usaha akan dipertingkatkan untuk mewujudkan sistem kesihatan yang mampan, mengoptimum penggunaan sumber kewangan untuk penjagaan kesihatan, memperkukuh kesihatan penduduk dan mempererat kerjasama dalam kalangan pihak berkepentingan. Pelaksanaan inisiatif ini adalah penting kerana penduduk yang sihat adalah perlu untuk pembangunan dan kesejahteraan negara.

Mewujudkan sistem kesihatan yang mampan

Dasar Kesihatan Negara (DKN) akan diperkenalkan untuk menetapkan hala tuju pembangunan sektor penjagaan kesihatan selaras dengan aspirasi global oleh Pertubuhan Kesihatan Sedunia (WHO), khususnya Kesihatan dalam Semua Dasar dan Setiap Sektor adalah Sektor Kesihatan. DKN akan memberi tumpuan kepada kesihatan penduduk serta kemampuan sistem dan industri penjagaan kesihatan. Dalam hubungan ini, DKN bertujuan untuk memudah cara kerjasama dalam kalangan Kerajaan, rakyat dan organisasi untuk membangunkan sektor penjagaan kesihatan.

Sistem penyampaian penjagaan kesihatan akan diperkukuh bagi penyelarasan dan penguatkuasaan yang lebih baik pada peringkat nasional, wilayah dan negeri. Bidang penjagaan kesihatan yang akan diliputi termasuk kesihatan persekitaran, kebersihan dan sanitasi serta keselamatan makanan dan pemakanan untuk pengurusan kesihatan awam yang lebih baik. Di samping itu, Kerajaan akan meneroka skim penjagaan kesihatan ke arah mewujudkan skim pembiayaan kesihatan nasional. Skim ini akan menyediakan bantuan perawatan penjagaan primer kepada isi rumah B40 untuk memastikan liputan kesihatan yang menyeluruh.

Kemudahan dan perkhidmatan kesihatan awam yang tidak mencukupi, terutama di kawasan bandar terus menjadi kebimbangan dalam memenuhi keperluan penjagaan kesihatan

penduduk. Situasi ini, sebahagiannya disebabkan oleh kos penjagaan kesihatan swasta yang lebih tinggi secara relatif, mengakibatkan lebih ramai pesakit mendapatkan perkhidmatan penjagaan kesihatan awam. Sehubungan itu, Kerajaan akan memberi tumpuan kepada perkhidmatan penjagaan kesihatan primer dan perkhidmatan berasaskan komuniti untuk menambah baik penyampaian perkhidmatan penjagaan kesihatan melalui libat urus yang lebih baik dengan pihak berkepentingan. Sebagai tambahan, lebih banyak hospital dan klinik akan dibina untuk menambah baik akses kepada penjagaan kesihatan berkualiti dan meningkatkan nisbah katil hospital kepada penduduk. Kemudahan kesihatan sedia ada juga akan dinaik taraf. Sementara itu, lebih banyak hospital bukan pakar akan menyediakan perkhidmatan kepakaran secara berjadual iaitu pakar akan bertugas di hospital berkenaan secara berkala. Antara bidang perkhidmatan kepakaran yang ditawarkan ialah perkhidmatan penjagaan geriatrik, penjagaan paliatif dan pemulihan. Pembangunan kemudahan dan perkhidmatan kesihatan yang baharu akan diselaras dengan keperluan sumber manusia.

Kekurangan kemudahan perhubungan dan kekerapan yang rendah bagi klinik bergerak serta ketidacukupan kemudahan kesihatan masih menjadi cabaran dalam penyampaian perkhidmatan penjagaan kesihatan di kawasan luar bandar dan terpencil. Sehubungan itu, liputan perkhidmatan penjagaan kesihatan primer akan diperluas lagi melalui penyediaan perkhidmatan penjagaan kesihatan yang lebih dekat dengan komuniti, kediaman dan individu. Perkhidmatan tersebut meliputi penjagaan kesihatan domisiliari, penjagaan paliatif, klinik bergerak serta program jangkauan penjagaan kesihatan oral dan karnival saringan mata. Di samping itu, perkhidmatan sedia ada termasuk intervensi pencegahan kesihatan secara komprehensif merangkumi imunisasi, pemakanan, sanitasi, penjagaan antenatal dan perinatal akan diperkukuh.

Sejak kebelakangan ini, produk dan perkhidmatan penjagaan kesihatan yang dijual secara dalam talian telah meningkat dengan cepat dan sebahagian daripadanya membawa kesan buruk kepada pengguna. Produk dan perkhidmatan ini tidak dipantau atau dikawal selia dalam aspek keselamatan, kualiti, keberkesanan dan

etika. Oleh itu, dasar dan peraturan baharu akan digubal bagi mengawal selia produk dan perkhidmatan penjagaan kesihatan dalam talian. Peraturan ini bertujuan untuk melindungi pengguna serta memastikan keselamatan, kualiti dan pematuhan kepada standard dalam kalangan penggiat industri. Selain itu, rangka kerja kawal selia dan dasar bagi perancangan ke hadapan akan dirangka untuk mengambil kira perkhidmatan dan teknologi baru muncul seperti perkhidmatan penjagaan kesihatan digital, analisa data raya, *blockchain* dan kecerdasan buatan.

Mengoptimum sumber kewangan untuk penjagaan kesihatan

Dalam menangani peningkatan beban kewangan dalam sektor penjagaan kesihatan awam, mekanisme pembiayaan alternatif dan mampan seperti dana antarabangsa dan wakaf dalam penjagaan kesihatan akan dipergiat. Kerjasama antara Kementerian Kesihatan Malaysia (KKM) dengan MAIN seperti penyediaan Pusat Pembedahan Katarak MAIWP-Hospital Selayang dan Pusat Bersalin Berisiko Rendah MAIWP-Hospital Putrajaya akan diperluas ke seluruh Malaysia. Selain itu, sektor swasta dan NGO akan digalakkan untuk menubuhkan lebih banyak kemudahan kesihatan yang memenuhi keperluan isi rumah miskin, berpendapatan rendah dan sederhana sebagai sebahagian daripada tanggungjawab sosial.

Memperkukuh kesihatan penduduk

Ekosistem kesihatan yang lebih baik akan dibangunkan sebagai tindak balas kepada peningkatan insiden penyakit berjangkit (CD) dan penyakit tidak berjangkit (NCD). Ekosistem ini akan memberi fokus kepada beberapa faktor termasuk amalan sihat, persekitaran fizikal, penjagaan klinikal dan sosioekonomi. Dalam konteks ini, usaha untuk memerangi CD akan dipergiat menerusi pelbagai inisiatif kesihatan seperti penyelidikan dan pembangunan, program imunisasi, saringan kesihatan dan kesedaran kesihatan. Langkah bagi mencegah NCD pula termasuk program Komuniti Sihat Pembina Negara (KOSPEN) dan Komunikasi untuk Perubahan

Tingkah Laku (COMBI) akan terus diperkukuh. Di samping itu, pelaksanaan pelbagai dasar seperti Pelan Tindakan Pemakanan Kebangsaan Malaysia III (2016-2025), Akta Air Minum yang Selamat 2017, Pelan Strategik Kebangsaan untuk Gaya Hidup Aktif (2017-2025) dan Pelan Strategik Malaysia Penyakit Baru Muncul dan Kejadian Kecemasan Kesihatan Awam (2017-2021) akan terus dipergiat. Dalam tempoh akhir Rancangan, pusat kawalan dan pencegahan penyakit kebangsaan akan dibangunkan untuk mengesan, mencegah dan mengatasi ancaman pelbagai penyakit. Sementara itu, dua institusi perubatan khusus iaitu Kompleks Endokrin di Hospital Putrajaya dan Pusat Kardiologi di Hospital Serdang akan ditubuh dan dijangka siap pada tahun 2022. Kompleks Endokrin akan menyediakan perkhidmatan perubatan khusus dan pembedahan kepada pesakit endokrin¹³ serta menjalankan penyelidikan dan latihan. Manakala Pusat Kardiologi akan menambah baik perkhidmatan kardiologi sedia ada di Hospital Serdang termasuk pembedahan kardiotorasik¹⁴. Selain itu, pusat kanser baharu di wilayah utara akan dibina sebagai pelengkap kepada Institut Kanser Negara. Sementara itu, Institut Kesihatan Negara yang merupakan pusat tumpuan dalam penyelidikan kesihatan dan perubatan akan distruktur semula dan diperkasa bagi meningkatkan peranannya.

Kesihatan mental merupakan masalah kesihatan awam yang kompleks dan rumit yang memberi impak kepada psikologi, emosi, sosial dan ekonomi. Mengambil kira kepentingan untuk mengekalkan kesejahteraan mental, pelan tindakan kesihatan mental akan dirangka untuk mempromosi kesedaran kesihatan mental. Pelan tindakan ini akan meliputi enam bidang utama dalam kesihatan mental, iaitu perkhidmatan dan penjagaan kesihatan mental, kerjasama merentas sektor, pembangunan sumber manusia, promosi kesihatan mental dalam kalangan komuniti serta penyelidikan dan pengawasan. Di samping itu, usaha akan dipergiat untuk menambah baik perkhidmatan kesihatan mental.

¹³ Endokrin/endokrinologi merujuk kepada bidang subkepakaran perubatan berkaitan sistem endokrin, penyakit berkaitan dan rembesan khusus yang dikenali sebagai hormon. Subkepakaran ini melibatkan pengurusan penyakit gangguan hormon kelenjar endokrin yang merangkumi hipotalamus, kelenjar pituitari, kelenjar pineal, tiroid, paratiroid, pankreas, kelenjar adrenal, testis dan ovari serta pengurusan gangguan metabolik seperti obesiti dan gangguan lemak darah.

¹⁴ Kardiotorasik merujuk kepada pembedahan yang dilakukan ke atas organ dalaman di bahagian toraks atau dada, secara umumnya adalah rawatan untuk masalah jantung dan vaskular yang merangkumi aorta dan vena kava serta penyakit paru-paru.



Nisbah kematian ibu mengandung semakin membimbangkan terutama disebabkan oleh embolisme obstetrik, pendarahan teruk selepas bersalin dan masalah perubatan yang berkaitan. Sehubungan itu, usaha untuk mengelakkan kematian ibu bersalin yang boleh dicegah akan dipertingkatkan dengan memastikan akses kepada perkhidmatan penjagaan kesihatan berkualiti tinggi semasa mengandung dan melahirkan anak. Di samping itu, perkhidmatan intervensi kesihatan seperti akses kepada perkhidmatan kesihatan seksual dan reproduktif dan perancangan keluarga akan terus disediakan.

Mempererat kerjasama dalam kalangan pihak berkepentingan

Usaha menambah baik perkhidmatan kesihatan awam terutama semasa bencana dan wabak oleh pelbagai sektor dalam kalangan kementerian dan agensi serta NGO akan terus dipertingkatkan. Sehubungan itu, kerjasama antara agensi akan diperkukuh dan dipertingkatkan melalui penyelarasan yang lebih teratur dengan menggembelng agensi kerajaan dan CSO yang berkaitan. Kerjasama ini akan memberi tumpuan kepada penambahbaikan masa respons kecemasan, pencegahan wabak, kesiapsiagaan terhadap bencana termasuk respons dan mitigasi serta rehabilitasi awal.

Perkhidmatan penjagaan kesihatan di rumah yang kebanyakannya disediakan oleh sektor swasta adalah mahal dan tidak mampu dibayar oleh majoriti rakyat. Sehubungan itu, sektor swasta dan NGO akan digalakkan untuk menyediakan lebih banyak khidmat sosial bagi memenuhi keperluan pesakit dalam kalangan isi rumah berpendapatan rendah dan sederhana, yang memerlukan rawatan jangka panjang. Di samping itu, perkhidmatan yang disediakan oleh Kerajaan seperti Perkhidmatan Penjagaan Kesihatan Domisiliari dan Program Khidmat Bantu di Rumah akan terus diperkukuh melalui penyertaan yang lebih meluas daripada sektor swasta, CSO, NGO dan sukarelawan.

Strategi B4: Menjadikan Negara Lebih Selamat dan Terjamin

Keselamatan dan ketenteraman awam merupakan keutamaan bagi memastikan taraf hidup dan kesejahteraan rakyat yang lebih baik. Dalam tempoh akhir Rancangan, pelaksanaan inisiatif akan ditumpu kepada usaha meningkatkan sumber dan kapasiti agensi penguatkuasaan dan keselamatan serta mempergiat langkah pencegahan jenayah. Komuniti akan digalakkan untuk memainkan peranan yang lebih besar bagi meningkatkan keselamatan dan ketenteraman awam dalam melengkapkan usaha Kerajaan tersebut.

Memperkukuh agensi penguatkuasaan dan keselamatan

Kebolehan dan keupayaan anggota penguat kuasa dan keselamatan terutama Angkatan Tentera Malaysia (ATM) dan Polis Diraja Malaysia (PDRM) akan terus dipertingkatkan melalui latihan yang lebih sistematik dan kursus khusus yang terkini seperti analisis jenayah dan penyiasatan. Selain itu, anggota akan dilengkapi dengan peralatan yang bersesuaian bagi pengumpulan maklumat perisikan, penyiasatan, penganalisan bukti dan pendakwaan. Usaha ini akan meningkatkan kecekapan anggota penguat kuasa dan keselamatan serta persepsi awam terhadap keselamatan.

Keselamatan negara akan diperkukuh melalui peningkatan kawalan dan pengawasan sempadan yang berterusan, terutama menggunakan teknologi dan peralatan terkini bagi mengekang pencerobohan sempadan. Sementara itu, kawalan di pintu masuk dan keluar negara akan dipertingkatkan untuk menghalang sebarang kemasukan yang menyalahi undang-undang dan aktiviti haram termasuk pergerakan pengganas. Usaha ini termasuk operasi dan rondaan bersama oleh pelbagai agensi penguat kuasa sempadan seperti ATM, PDRM, Agensi Kawalan Sempadan Malaysia, Jabatan Kastam Diraja Malaysia, Jabatan Imigresen Malaysia dan Agensi Penguatkuasaan Maritim Malaysia.

Kerjasama antarabangsa melalui persefahaman dua hala dan pelbagai hala dengan negara lain dan badan kepolisan antarabangsa akan dipergiat untuk menangani isu jenayah rentas sempadan, jenayah siber, keganasan dan jenayah terancang. Persefahaman ini termasuk perkongsian pintar, penempatan pegawai, perkongsian maklumat dan risikan serta amalan terbaik. Selain itu, kerjasama dengan agensi respons kecemasan siber pada peringkat antarabangsa akan diperkuh bagi mengesan amaran awal terhadap bentuk ancaman siber baharu.

Mempregiat usaha pencegahan jenayah

Langkah untuk membanteras jenayah oleh PDRM akan dipergiat melalui Program *Omnipresence* dengan menempatkan semula lebih ramai anggota polis untuk mencegah jenayah. Sehubungan itu, usaha akan dipertingkat untuk mengukuhkan libat urus dan meningkatkan penyertaan orang awam dalam pencegahan jenayah. Selain itu, orang awam akan digalak untuk mengamalkan *self-policing* dan memasang sistem pencegahan kecurian di tempat kediaman bagi mencegah jenayah. Sektor swasta juga akan digesa untuk menyokong usaha pencegahan jenayah sebagai sebahagian daripada tanggungjawab sosial korporat bagi mewujudkan persekitaran yang lebih selamat.

Program pembudayaan dan kesedaran mengenai pencegahan jenayah akan diperluas melalui media sosial, dengan memberi tumpuan kepada golongan berisiko tinggi seperti kanak-kanak dan belia. Pencegahan penglibatan juvana dalam penagihan dadah dan kegiatan jenayah akan dilaksana melalui program kaunseling dan pendidikan. Selain itu, pendekatan bersepadu akan dilaksana untuk mendidik remaja mengenai pencegahan penagihan dadah, hubungan seks sebelum perkahwinan dan jenayah berkaitan seks, *Human Immunodeficiency Virus (HIV)/Acquired Immune Deficiency Syndrome (AIDS)* dan jenayah lain. Usaha ini akan melibatkan pelbagai agensi seperti PDRM, Kementerian Pendidikan Malaysia, KKM dan Jabatan Kebajikan Masyarakat serta NGO melalui pelaksanaan pelbagai kempen dan program.

Penglibatan NGO dan orang awam akan dipertingkat dalam program rawatan, pemulihan dan pascapemulihan; mengenal pasti kes baharu penyalahgunaan dadah; serta pelaksanaan

program jangkauan dan sokongan komuniti. NGO dan masyarakat juga digalak untuk membantu bekas banduan dan penagih dadah mendapatkan pekerjaan dan menyesuaikan diri dalam masyarakat. Selain itu, Dasar Dadah Negara 2017 yang menggariskan pendekatan strategik bagi menangani isu berkaitan dadah akan dilaksana dalam tempoh akhir Rancangan. Dasar ini merangkumi lima teras iaitu pencegahan, rawatan dan pemulihan, penguatkuasaan, pengurangan kemudaratan dan kerjasama antarabangsa.

Pengukuran jenayah indeks dalam Rancangan Malaysia Kesebelas sebelum ini adalah berdasarkan kepada jumlah kes jenayah indeks yang dilaporkan, iaitu dengan sasaran pengurangan sebanyak 5% setiap tahun. Pengukuran ini akan diganti dengan menetapkan sasaran baharu iaitu jumlah jenayah indeks tidak melebihi had 342 kes bagi setiap 100,000 penduduk pada tahun 2020. Sasaran baharu ini menetapkan nilai asas pada 352 kes bagi setiap 100,000 penduduk pada tahun 2016 akan mengambil kira pertambahan penduduk selaras dengan amalan antarabangsa.

Strategi B5: Menggalakkan Nilai Murni dan Gaya Hidup Aktif

Masyarakat penyayang yang menjiwai nilai murni dan mengamalkan gaya hidup aktif dan sihat adalah lambang sebuah masyarakat yang maju. Oleh itu, dalam tempoh akhir Rancangan, tumpuan akan diberi untuk menggalakkan nilai murni, memupuk budaya kebangsaan serta kesepaduan sosial dan perpaduan nasional di samping menggalakkan amalan gaya hidup aktif dan sihat dalam kalangan rakyat. Inisiatif ini akan memastikan pembangunan fizikal seiring dengan pembangunan kerohanian bagi meningkatkan kesejahteraan secara menyeluruh.

Menggalakkan nilai murni

Nilai etika dan moral yang teguh adalah penting dalam membina masyarakat Malaysia yang progresif dan bersatu seperti yang dihasratkan dalam Wawasan 2020. Nilai unggul dalam lima prinsip Rukun Negara khususnya kepercayaan agama, tingkah laku dan nilai moral yang baik akan menjadi asas dalam membangunkan sebuah



masyarakat penyayang dan beretika. Sehubungan itu, usaha akan dipergiat untuk menyemai nilai murni seperti jujur, sopan, hormat, sabar serta integriti dalam kalangan rakyat melalui program pendidikan dan kempen kesedaran.

Memupuk budaya kebangsaan

Usaha dan inisiatif akan terus diperkukuh untuk mengekalkan kepelbagaian budaya masyarakat dan membentuk identiti Malaysia. Sehubungan itu, peranan keluarga, sekolah dan komuniti akan diperkukuh dalam membentuk nilai dan membina jati diri generasi muda Malaysia yang utuh. Inisiatif mempromosi warisan negara, nilai budaya dan elemen sejarah masyarakat Malaysia yang berbilang kaum akan diteruskan bagi meningkatkan pemahaman mengenai pembinaan negara bangsa. Di samping itu, tumpuan akan diberi untuk menggalakkan seni, budaya dan industri kreatif bagi mempromosi nilai murni dan memupuk budaya kebangsaan.

Memupuk kesepaduan sosial dan perpaduan nasional

Dalam meletakkan Malaysia pada peringkat global sebagai sebuah negara yang mementingkan keharmonian dan kemakmuran masyarakat, majlis perundingan keharmonian akan ditubuhkan. Dasar dan inisiatif untuk memperkukuh integrasi sosial dan perpaduan nasional akan dipertingkat untuk interaksi, libat urus dan kerjasama yang lebih baik dalam kalangan rakyat. Kerajaan juga akan menerajui usaha untuk menggubal undang-undang berkaitan keharmonian negara bagi memastikan kesaksamaan dan menghapuskan diskriminasi. Di samping itu, indeks perpaduan nasional akan dibangun untuk berfungsi sebagai instrumen pemantauan bagi mengukur tahap perpaduan dan keharmonian negara. Sementara itu, program bertemakan perpaduan menggunakan platform sukan, kesukarelawanan, seni dan budaya

serta komuniti akan terus digalakkan untuk mempromosi detik perpaduan dan memperkukuh semangat patriotisme.

Menggalakkan amalan gaya hidup aktif dan sihat

Sukan akan terus kekal sebagai elemen penting dalam menggalakkan gaya hidup yang aktif dan sihat ke arah meningkatkan kesejahteraan rakyat meskipun terdapat cabaran dalam memupuk budaya bersukan. Sehubungan itu, lebih banyak kemudahan sukan dan rekreasi akan dibangun dan dinaik taraf termasuk laluan basikal dan kawasan rekreasi hijau di bandar, infrastruktur sukan-eko, litar lumba motosikal serta industri e-sukan melalui kerjasama antara Kerajaan dengan sektor korporat dan persatuan sukan kebangsaan. Sementara itu, orang awam akan digalakkan untuk menggunakan kemudahan sukan di sekolah kerajaan serta institusi pendidikan tinggi dan institusi latihan awam.

Pendekatan baharu keseluruhan sukan di Malaysia akan digabungkan dalam merangka pelan hala tuju sukan negara bagi menggalakkan gaya hidup sihat dan kecemerlangan bersukan. Program pembangunan bakat sukan akan dipergiat dalam mengenal pasti dan membimbing atlet yang berpotensi pada peringkat sekolah dan pendidikan tertiar. Teras pendekatan ini adalah pembangunan rangka kerja sukan negara yang bersepadu dan efektif untuk meningkatkan inklusiviti dan integrasi sosial serta pembinaan kapasiti dan penambahbaikan tadbir urus pelbagai organisasi sukan. Di samping itu, sokongan kepada atlet elit melalui pelbagai program sukan berprestasi tinggi akan diteruskan untuk Sukan SEA 2019. Inisiatif ini juga akan meningkatkan peluang Malaysia untuk memenangi pingat emas Olimpik yang pertama pada Sukan Olimpik Tokyo 2020.

Kesimpulan

Dalam tempoh akhir Rancangan, pendekatan pembangunan inklusif akan dipergiat untuk meningkatkan kesejahteraan rakyat secara menyeluruh sejajar dengan pertumbuhan ekonomi. Seiring dengan prestasi yang telah dicapai, usaha akan dilipat ganda untuk meningkatkan pendapatan dan kuasa beli isi rumah B40, memperkukuh Komuniti Ekonomi Bumiputera serta memperkasa golongan minoriti dan kumpulan sasar khusus. Sementara itu, kualiti hidup rakyat akan ditambah baik melalui langkah untuk meningkatkan kuasa beli, akses kepada perumahan mampu milik dan berkualiti dan penjagaan kesihatan serta keselamatan dan ketenteraman negara. Pada masa yang sama, nilai murni dan semangat patriotisme dalam kalangan rakyat akan terus disemai untuk memupuk kesepaduan sosial dan perpaduan nasional yang lebih utuh, manakala sukan dan gaya hidup aktif akan digalak untuk membina masyarakat yang sihat dan sejahtera. Pelaksanaan inisiatif yang telah dikenal pasti secara efektif adalah kunci untuk mencapai semua outcome yang disasarkan, selaras dengan Agenda 2030 untuk Pembangunan Mampan oleh Pertubuhan Bangsa-Bangsa Bersatu.



12

B A B